

01 OCT 2002

Mahathir-Selamat

BAHAYA BUKAN BERPUNCA DI MALAYSIA, KATA MAHATHIR

KUALA LUMPUR, 1 Okt (Bernama) -- Datuk Seri Dr Mahathir Mohamad hari ini berkata pelawat dan ahli perniagaan termasuk dari Amerika Syarikat dan Kanada tahu bahawa Malaysia adalah sebuah negara yang selamat, malah jauh lebih selamat daripada negara mereka sendiri.

Perdana Menteri berkata hakikatnya ialah beberapa kejadian keganasan berlaku bukannya di Malaysia tetapi di negara barat.

"Serangan yang dilakukan ialah ke atas negara mereka sama ada dengan merempuh bangunan sehingga tumbang atau menyebarkan (virus) antraks. Semuanya di sana. Jadi di sana yang bahaya. Malaysia tak ada bahaya," katanya pada sidang berita selepas merasmikan simposium dan ekspo bioteknologi antarabangsa, BioMalaysia 2002, di Pusat Dagangan Dunia Putra di sini.

Dr Mahathir menjawab beberapa pertanyaan pemberita berhubung tindakan Amerika dan Kanada memperkenalkan peraturan imigresen lebih ketat untuk pelawat ke kedua-dua negara itu, termasuk dari Malaysia.

Kepada satu soalan, beliau berkata secara amnya sudah wujud perasaan histeria anti-Muslim akibat daripada tindakan segelintir orang.

Kesan daripada perbuatan segelintir orang ini, keseluruhan umat Islam dipandang secara negatif, katanya.

Ini telah menyebabkan pemeriksaan lebih ketat dilakukan khususnya terhadap pelawat di kalangan orang Islam untuk menentukan mereka bukan pengganas, kata Dr Mahathir.

"Memanglah agak malang pendirian seperti ini diambil tetapi itu adalah negara mereka," katanya.

Ketika ditanya sama ada beliau kesal dengan apa yang berlaku, Dr Mahathir berkata : "Sudah tentu saya kesal. Saya bukannya pencuri. Saya bukannya pengganas."

Perdana Menteri turut menceritakan satu kejadian di New York melibatkan seorang pegawai Amerika ketika beliau dalam perjalanan ke Washington semasa satu lawatan ke Amerika Syarikat baru-baru ini.

"Sebenarnya waktu saya sampai di New York, waktu saya dijemput untuk pergi ke Washington, pegawai yang naik jet saya dengan keras berkata tiada siapa boleh bergerak sehingga kami periksa.

"Kalau nak periksa pun, periksalah, tak payahlah keras-keras sangat," kata Dr Mahathir.

Beliau juga ditanya tentang laporan yang menyebut Timbalan Perdana Menteri Datuk Seri Abdullah Ahmad Badawi terpaksa menanggalkan kasut untuk tujuan pemeriksaan keselamatan di Amerika.

Perdana Menteri berkata itu menunjukkan bahawa pihak berkuasa Amerika tidak memikirkan langsung tentang kedudukan seseorang sebagai seorang pemimpin sebuah negara luar untuk menerima layanan seumpama itu.

-- BERNAMA

MAM AHH MAI